

दिनांक 06.02.2023

समय 18.50 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कर्नाटक रा बैंगलुरु मांय भारत ऊर्जा सप्ताह रो उद्घाटन कीनो –दूजा देशां रा निवेशकां कानी ऊं भारत रा ऊर्जा हलका मांय निवेश रा मौका री तलाश करण सारु कह्यो।
- मुख्यमंत्री अशोक गहलोत कह्यो-राज्य मांय अपराधां माथे काबू करण अर जनता मांय पुलिस रा प्रति भरोसो बधावण री हर संभव कोशिश करी जा रही है।
- उत्तर-पश्चिम रेलवे लारला नौ साल मांय साढ़े तीन हजार किलोमीटर ऊं बत्ती लेणां ने बिजली ऊं चालण वाळी गाड़ियां रे लायक बणायी।
- प्रदेश रा छह जिलां मांय अफ्रीकन स्वाइन फीवर रा मामला सामी आया- ब्लॉक स्तर माथे नियंत्रण दल बणायी ज्या।

अर

- राज्य मांय पारो चढबा ऊं ठण्ड ऊं साता मिली- कठे-कठे पारो 30 डिग्री ने पार कीनो।

000

प्रधानमंत्री नरेन्द्र मोदी आज बैंगलुरु मांय भारत ऊर्जा सप्ताह-2023 रो उद्घाटन कीनो। ई मौके प्रधानमंत्री इंडियन ऑयल री इंडोर सौर कुकिंग प्रणाली रो टिवन-कुकर्टाप मॉडल जनता ने सूप्यो। वे इंडियन ऑयल री अनबॉटल्ड पहल रा तहत वर्दी ई लॉन्च कीनी। वे कह्यो के भारत रो गैस पाइप लाइन नेटवर्क आवता चार-पांच साल मांय मौजूदा 22 हजार किलोमीटर ऊं बध र 35 हजार किलोमीटर ढे जावेला। प्रधानमंत्री कह्यो के गैस अन्वेषण हलका ने दस लाख वर्ग किलोमीटर ताई सीमित करी ज्यो है। कार्यक्रम मांय प्रधानमंत्री कह्यो के भारत साल 2030 ताई एनर्जी मिक्स मांय प्राकृतिक गैस रो इस्तेमाल बधावण सारु मिशन मोड माथे काम कर रह्यो है। वे कह्यो के 21वीं सदी मांय दुनिया रो भविष्य तय करण मांय एनर्जी सेक्टर री मोटी भूमिका है। प्रधानमंत्री कह्यो के ऊर्जा रा नुवा साधन विकसित करण सारु भारत दुनिया मांय मजबूत केन्द्र रा तौर ऊं सामी आ रह्यो है। मोदी कह्यो के भारत दुनिया मांय ग्रीन हाइड्रोजन रा बारा मांय ई अगाड़ी है। प्रधानमंत्री तुमकुरु मांय हिंदुस्तान एयरोनॉटिक्स लिमिटेड रो हेलीकॉप्टर बणावण रो कारखानो देश ने सूप्यो। वे तुमकुरु औद्योगिक टाउनशिप रा काम रा नींव ई रख्यी।

000

राष्ट्रपति द्रौपदी मुर्मू कह्यो है के माली बरकत री तेज रफ्तार हासिल करण सारु डिजिटल कनेक्टिविटी बधावण मांय दूरसंचार हलका रो खास काम है। वे आज नई दिल्ली मांय भारतीय डाक, दूरसंचार लेखा अर वित्त सेवा रा सिखावण ले रह्या अहलकारां ने संबोधित कर रही ही। राष्ट्रपति कह्यो के डिजिटल इंडिया री पहल सरकार री न्यारी-न्यारी सार्वजनिक सेवावां बत्ती दक्षता अर साफगोई सागे मुहैया करावण मांय मदद कर रही है। वे खास तौर ऊं गांवाई अर दूरदराज हलकां मांय वंचित लोगां ने जोड़बा सारु कोशिश जारी राखण री जरूरत माथे जोर दीनो। भारतीय नौसेना सामग्री प्रबंधन सेवा रा अहलकार, केंद्रीय इंजीनियरिंग सेवा रा सहायक कार्यकारी इंजीनियर, भारतीय डाक अर दूरसंचार लेखा अर वित्त सेवा रा सिखावण ले रह्या अहलकार आज राष्ट्रपति भवन मांय राष्ट्रपति सागे मुलाकात कीनी।

000

मुख्यमंत्री अशोक गहलोत कह्यो है के प्रदेश री जनता मांय पुलिस रा प्रति भरोसो बधावण सारु हर संभव कोशिश करी जा रही है। वे आज मुख्यमंत्री रा रेहवास ऊं वीडियो कॉन्फ्रेंस रे जरिये डी.आई.जी अर एस.पी. री मीटिंग मांय बोल रह्या हा। वे कह्यो के उदयपुर, सीकर अर जयपुर रा न्यारा-न्यारा वाक्यां मांय तुरत असरदार कार्रवाई कर र अपराधियां माथे काबू करी ज्यो है। गहलोत कह्यो के साम्प्रदायिक भाईचारा बिगाडबा रो कोई वाक्यो बर्दाश्त नी कर्यो जावेला। मुख्यमंत्री कह्यो के हाल ही

मांय प्रदेश मांय धमका र गैर-कानूनी तौर ऊं वसूली रा मामला सामी आया है। वे कहयो के ऐड़ी वारदातां मांय शामिल लोगां रे खिलाफ बेगी अर ठोस कार्रवाई करण रा हुकम दिया ज्या है।

000

सुप्रीम कोर्ट रा मुख्य न्यायाधीश न्यायमूर्ति डी. वाई. चंद्रचूड़ आज हाई कोर्टां रा पांच जजां ने सुप्रीम कोर्ट रा जज रा तौर ऊं शपथ दिरायी। शपथ लेवण वाळां मांय न्यायमूर्ति पंकज मिथल; न्यायमूर्ति संजय करोल; न्यायमूर्ति पीवी संजय कुमार; न्यायमूर्ति अहसानुद्दीन अमानुल्लाह अर न्यायमूर्ति मनोज मिश्रा शामिल हैं।

000

साल 2014 पाछे प्रदेश मांय 23 स्टेट हाई-वे रे नेशनल हाई-वे व्हेवण रो ऐलान करी ज्यो है। आं हाई-वे री लम्बाई 2 हजार 932 किलोमीटर है। अजमेर रा सांसद भागीरथ चौधरी रा सवाल रा जवाब मांय आ जाणकारी दीरीजी। जवाब मांय जाणकारी दीरीजी के जुड़ाव री जरूरत, पारस्परिक प्राथमिकता अर रकम री उपलब्धता रा आधार ऊं टेम-टेम परां मंत्रालय स्टेट हाई-वे रे नेशनल हाई-वे ऐलाण करण माथे विचार करयो जावे है। प्रदेश रा नसीराबाद-देवली स्टेट हाई-वे नम्बर 26 अर दौसा-दूदू-नागौर खंड ने नेशनल हाई-वे बणावण रा बारा मांय अधिसूचना जारी नी करीजी है।

000

उत्तर-पश्चिम रेलवे मांय लारला नौ साल मांय साढे तीन हजार किलोमीटर ऊं बत्ती रेलवे लेण ने बिजली ऊं चालण वाळी गाड़ियां लायक बणायी ज्यी है। आं लेणां ने बिजली ऊं चालण वाळी गाड़ियां लायक बणावण रा काम सारू उत्तर पश्चिम रेलवे ने 1 हजार 217 करोड़ रुपया आवंटित करी ज्या है। ई रे अलावा बिजली ऊं जुड़्या दूजा कामां सारू कोई 68 करोड़ रुपया मंजूर करी ज्या है।

000

जयपुर, अलवर, कोटा, सवाईमाधोपुर, भरतपुर अर करौली जिलां मांय सूअरां मांय अफ्रीकन स्वाइन फीवर रा मामला सामी आया है। पशुपालन विभाग रा निदेशक डॉ. भवानी सिंह राठौड़ आकाशवाणी ने बतायो के हाल ताई दो हजार सूअर ई बीमारी री फेंट मांय आ चुक्या है। वे बतायो के आं मांय ऊं कोई डोढ हजार सूअरां री मौत व्हे ग्यी है। वे बतायो के ई बीमारी रो कोई ईलाज नी है अर ई रे कारण मौत व्हेवण री रेट सब ऊं बत्ती है। विभाग अफ्रीकन स्वाइन फीवर रा मामलां माथे निजर राखण सारू ब्लॉक स्तर माथे टीमां बणायी है। अ टीमां सूअरां रे आवण-जावण री ठोडां रो सर्वे कर र ई बीमारी री रोकथाम अर ईलाज सारू हर संभव कार्यवाही करेला। बीमारी री फेंट मांय आया अर मर्या सूअरां रा नमूना ले र राष्ट्रीय उच्च सुरक्षा पशु रोग संस्थान, भोपाल भिजवाया जा रह्या है। पशुपालन विभाग रा निदेशक डॉ. भवानी सिंह राठौड़ बतायो के सूअरां मांय बीमारी माथे काबू करण सारू वन विभाग अर दूजा महकमा सागे तालमेल कर र कार्रवाई करी जा रही है।

000

पैली वाळी मुख्यमंत्री अर भारतीय जनता पार्टी री राष्ट्रीय उपाध्यक्ष वसुंधरा राजे डूंगरपुर जिला रा दो दिन रा दौरा रा दूजा दिन आज जोगपुर मांय पार्टी रा कार्यकर्तावां सागे मुलाकात कीनी। ई दौरान केई विधायक अर दूजा आला नेता वसुंधरा राजे सागे मुलाकात कीनी।

000

हनुमानगढ़ रा वॉर्ड नंबर 59 मांय एक नाबालिग टाबरी रो बालपणा मांय ब्याह नी करावण सारू वां रा पिरवार वाळां ने पाबंद करी ज्या है। जिला बाल कल्याण समिति री सिफारिश परां प्रशासन टाबरी रा कागजात देख र पिरवार वाळां री समझाइश कीनी।

000

अजमेर मांय आज गांधी दर्शन प्रशिक्षण शिविर सरू व्हयो। दो दिन रा ई शिविर मांय देश रा नामी-गिरामी गांधीवादी विचारक गांधी दर्शन री सिखावण दे रह्या है। शिविर मांय सरकार री फ्लैगशिप योजनावां री जाणकारी ई दी जा रही है।

000

अंतर्राष्ट्रीय मोटा अनाज वर्ष 2023 मांय मोटा अनाज रा प्रति जाग जगावण सारू आकाशवाणी समाचार जयपुर री ओर ऊं नुवी श्रृंखला चलायी ज्यी है। आप आकाशवाणी जयपुर रा व्हाट्सएप नंबर 9414052368 माथे संदेश भेज र रोजीना रा खाण-पीण मांय ज्वार, बाजरा सरीखा मोटा अनाज काम लेवण रा बारा मांय बता सको हो। आप संदेश रिकॉर्ड कर र या मांड र भेज सको हो। आं मांय ऊं

कुछ संदेश समाचार बुलेटिन मांय प्रसारित कर्या जावेला। नागौर जिला रा खींवसर रा कन्हैया लाल वां रा संदेश मांय मांड्यो के बाजरा री रोटी, दही अर ग्वार फली री साग सागे घणी स्वाद लागे है।

000

आकाशवाणी ऊं प्रसारित कर्या जावण वाळा प्रधानमंत्री रा खास कार्यक्रम मन की बात री सौवीं कड़ी सारू माई जीओवी ओपन फोरम माथे जिगल होड राखी जा रही है। होड मांय शिरकत करण सारू 25 ऊं 30 सैकेंड रो एक गीत अर आलेख देवणो व्हेला जो समझण मांय आसान अर जनता ऊं तुरत जुडबा वाळो व्हेवणो चाहिजे। बेहतरीन गीत ने ग्यारह हजार रूप्या रो नकद ईनाम दियो जावेला। ई सारू 28 फरवरी ताई प्रविष्टियां जमा कराई जा सके है। इण रो मकसद ऐडी यादगार अर आसानी ऊं पिछाणी जावण वाळी सुरीली धुन तैयार करणो है जो जनता रा दिल दिमाग मांय बस जावे। ई साल अप्रैल मांय ई कार्यक्रम री एक सौवीं कड़ी प्रसारित करी जावेला।

000

सूचना अर प्रसारण मंत्रालय रा केन्द्रीय संचार ब्यूरो रा क्षेत्रीय कार्यालय—उदयपुर कानी ऊं उदयपुर जिला री झाडोल पंचायत समिति मांय अमृत यात्रा चित्र प्रदर्शनी लगायी ज्यी है। विधायक बाबू लाल खराडी आज ई री सरूआत कीनी। ई प्रदर्शनी रे मार्फत देश री आजादी री लड़ाई रा बारा मांय जाणकारी दीरीजी है। ई मौके विधायक खराडी कह्यो के ई प्रदर्शनी ऊं नुवी पीढी ने देश री आजादी सारू मर—मिटबा वाळा रा बारा मांय जाणकारी हासिल करण रो मौको मिलेला। वे कह्यो के म्हां ने सहिष्णुता अर धैर्य सागे काम करण री जरूरत है। आ चित्र प्रदर्शनी 8 फरवरी ताई संवारे 10 ऊं सिज्यां पांच बज्यां ताई देखी जा सके है। आज स्कूली बच्चा, झाडोल सेक्टर री आंगनबाडी कार्यकर्ता अर आशा सहयोगनियां आ प्रदर्शनी देखी। सूचना अर प्रसारण मंत्रालय रा केन्द्रीय संचार ब्यूरो, जयपुर री ओर ऊं आज जयपुर रा अम्बाबाडी हलका रा आदर्श विद्या मन्दिर मांय आज अमृत यात्रा इंडिया एट ट्वंटी फॉर्टी सेवन मल्टीमीडिया प्रदर्शनी लगायी ज्यी। प्रदर्शनी री सरूआत जयपुर ग्रेटर नगर निगम री महापौर सौम्या गुर्जर कीनी। महापौर केन्द्रीय संचार ब्यूरो री लाइफ लाइन मिशन माथे आधारित मोबाइल वैन रो उद्घाटन कीनो। पांच दिन री ई प्रदर्शनी मांय केंद्र अर राज्य सरकार कानी ऊं जनता रा भला सारू चलायी जा रही योजनावां री जाणकारी दीरीजी है।

000

आई एम शक्ति उड़ान योजना रा तहत चित्तौड़गढ़ रा महाराणा प्रताप स्नातकोत्तर महाविद्यालय मांय सैनेट्री नैपकीन मुफ्त मुहैया कराया जा रह्या है। कॉलेज रा प्रिन्सीपल डॉ. गौतम कुमार कुकड़ा बतायो के ई योजना रा तैत कॉलेज री विद्यार्थी परिचय पत्र बता र सैनिटरी नैपकिंस ले सके है।

000

केन्द्र सरकार चित्तौड़गढ़ जिला रा चंदेरिया स्टेशन ने अमृत भारत स्टेशन योजना मांय शामिल कीनो है। ई योजना मांय शामिल नान्हा टेशनां ने लोकल थीम माथे विकसित कर र सजाया जावेला। चंदेरिया टेशन माथे सीसीटीवी कैमरा, 5जी इंटरनेट, वेटिंग रूम अर न्यारा—न्यारा टॉयलेट सरीखा सुबीता मुहैया कराया जावेला।

000

रेलवे ई—कैटरिंग सेवा रे मार्फत भोजन मंगावण बाबत मुसाफिरां सारू वाट्सएप नम्बर 8750001323 जारी कीनो है। सरूआत मांय व्हाट्सएप रे मार्फत ई—खानपान सेवा दो दौर मांय मुहैया करायी जावेला। व्हाट्सएप नंबर रा लिंक [www.ecatering.irctc.co.in](http://www.ecatering.irctc.co.in) माथे क्लिक कर र ई—कैटरिंग सेवा चुणबा सारू ई—टिकट बुक करावण वाळा मुसाफिर फायदो ले सके है।

000

राज्य मांय पारो चढबा ऊं दिन मांय ठण्ड रो असर लगभग खत्म व्हे ग्यो है। आठ ठोडां अधिकतम तापमान 30 डिग्री सेल्सियस ने पार कर ग्यो। कोटा मांय दिन मांय तापमान लगभग 32 डिग्री सेल्सियस दर्ज करी ज्यो। रात रो तापमान ई घणखर ठोडां चढ ग्यो है अर केवल अलवर, चूरू, बारां, चित्तौड़गढ़ अर करौली न्यूनतम तापमान 10 डिग्री सेल्सियस ऊं नीचे दर्ज करी ज्यो। मौसम विभाग आवता चौबीस घंटा मांय न्यूनतम तापमान मांय 2 ऊं 3 डिग्री सेल्सियस री गिरावट रा आसार जताया। है।

000